

佛說稻秆經

失譯人名附東晉錄

如是我聞一時佛住王舍城耆闍崛山中與大比丘衆千二百五十人俱及大菩薩摩訶薩衆爾時尊者舍利弗往至彌勒經行處其彌勒舍利弗俱坐石上爾時尊者舍利弗問彌勒言今日世尊觀見稻秆而作是說汝等比丘見十二因緣即是見法見法即是見佛爾時世尊作是說已嘿然而住舍利弗言彌勒世尊何故說是修多羅復以何義說見十

二因緣即是見法見法即是見佛皆以何義作如是說云何是十二因緣云何見因緣即是見法云何見法即是見佛爾時彌勒語舍利弗言佛世尊常說見十二因緣即是見法見法即是見佛十二因緣者無明緣行行緣識識緣名色名色緣六入六入緣觸觸緣受受緣愛愛緣取取緣有有緣生生緣老死憂悲苦惱衆苦聚集爲大苦陰作因緣是故佛說十二因緣云何是法八正道分及涅槃果如來略說是法云何是佛能覺一切法故名

爲佛若以慧眼見真法身能成菩提所學之法云何見十二因緣即是見法云何見法即是見佛佛作是說十二因緣常相續起無生如實見不顛倒無生無作非有爲無住無爲非心境界寂滅無相以是故見十二因緣即是見法常相續起無生如實見不顛倒無生無作非有爲無住無爲非心境界寂滅無相以是故見十二因緣即是見無上道具足法身尊者舍利弗問彌勒言云何名十二因緣彌勒答言有因有緣是名因緣法此是佛略

說因緣相以此因能生是果如來出世因緣生法如來不出世亦因緣生法性相常住無諸煩惱究竟如實非不如實是真實法離顛倒法復次十二因緣法從二種生云何爲二一者因二者果因緣生法復有二種有內因緣有外因緣良八外因緣法從何而生十一如似種子能生於芽從芽生葉從葉生節從節生莖從莖生穗從穗生華從華生實無種子故無芽乃至無有華實有種子故芽生乃至有華故果生而種子不作念我能生芽芽亦不作是

念我從種子生乃至華亦不作念我能生實
實亦不作念我從華生而實種子能生於芽
如是名爲外因生法云何名外緣生法所謂
地水火風空時地種堅持水種濕潤火種成
熟風種發起空種不作障礙又假於時節氣
和變如是六緣具足便生若六緣不具物則
不生地水火風空時六緣調和不增減故物
則得生地亦不言我能持水亦不言我能潤
火亦不言我能成熟風亦不言我能發起空
亦不言我能不作障礙時亦不言我能令生

種亦不言我從六緣而得生芽芽亦不言我
從爾數緣生雖不作念從爾數緣生而實從
衆緣和合得生芽亦不從自生亦不從他生
亦不從自他合生亦不從自在天生亦不從
時方生亦不從本性生亦不從無因生是名
生法次第如是外緣生法以五事故當知不
斷亦非常亦不從此至彼如芽種少果則衆
多相似相續不生異物云何不斷從種芽根
莖次第相續故不斷云何非常芽莖華果各
自別故非常亦不從種滅而後芽生亦非不

滅而芽便生而因緣法芽起種謝次第生故
非常種芽名相各異故不從此至彼種少果
多故當知不一是名種少果多如種子不生
異果故名相似相續以此五種外緣諸法得
生內因緣法從二種生云何為因從無明乃
至老死無明滅即行滅乃至生滅故則老死
滅因無明故有行乃至因有生故則有老死
無明不言我能生行行亦不言我從無明生
乃至老病死亦不言我從生生而實有無明
則有行有生則有老死是名內因次第生法

云何名內緣生法所謂六界地界水界火界
風界空界識界何謂為地能堅持者名為地
界何謂為水能潤漬者名為水界何謂為火
能成熟者名為火界何謂為風能出入息者
名為風界何謂為空能無障礙者名為空界
何謂為識四陰五識亦言為名亦名為識如
是衆法和合名為身有漏心名為識如是四
陰為五情根名為色如是等六緣名為身若
六緣具足無損減者則便成身是緣若減身
則不成地亦不念我能堅持水亦不念我能

濕潤火亦不念我能成熟風亦不念我能出入息空亦不念我能無障礙識亦不念我能生長身亦不念我從爾數緣生若無此六緣身亦不生地亦無我無人無衆生無壽命非男非女亦非男非女非此非彼水火風乃至識等亦皆無我無衆生無壽命乃至亦非此非彼云何名無明無明者於六界中一生想聚想常想不動想不壞想內生樂想衆生想壽命想人想我想我所想生如是種種衆多想是名無明如是五情中生貪欲瞋恚

想行亦如是隨著一切假名法名為識四陰爲名色陰爲色是名名色名色增長生六入六入增長生觸觸增長生受受增長生愛愛增長生取取增長生有有增長故能生後陰爲生生增長變名爲老受陰敗壞故名爲死能生嫉熱故名憂悲苦惱五情違害名爲身苦意不和適名爲心苦如是等衆苦聚集常在闇冥名為無明造集諸業名為行分別諸法名為識有所建立名為名色六根開張名為六入對緣取塵故名爲觸受覺苦樂故名

爲受如渴求飲故名爲愛能有所取故名爲
取起造諸業故名爲有後陰始起故名爲生
住世衰變故名爲老最後敗壞故名爲死追
感往事言聲哀感名爲憂苦事來逼身名爲
苦惱追思相續故名爲悲煩惱纏縛故名爲
惱邪見妄解名爲無明以此邪解起於三業
故名爲行善惡等業能受果報故名爲識從
汙穢無記業生汙穢無記識不動業生不動
識從識生名色從名色生六入從六入生觸
從觸生受從受生愛從愛生取從取生有從

有生生從生有老死憂悲苦惱彌勒語尊者
舍利弗十二因緣各各有果非常非斷非有
爲不離有爲非盡法非離欲法非滅法有佛
無佛相續不斷如河駛流間無絕時爾時彌
勒重語尊者舍利弗十二因緣各各有因各
各有緣良八非常非斷非有爲不離有爲非盡法十四
非離欲法非滅法有佛無佛相續不斷如河
駛流間則無絕能以四緣增長十二緣何等
爲四無明愛業識識爲種體業爲田體無明
愛是煩惱體能生長識業爲識田愛爲潤漬

無明覆植識種子業不作念我能生識種愛
亦不作念我能潤漬無明亦不作念我能覆
植識種識亦不作念我從爾數因緣生復次
業爲識田無明爲糞愛水爲潤便生名色等
芽而名色芽亦不從自生亦不從他生亦不
從自他合生亦不從自在天生亦不從時方
生亦不從體生亦不無因緣生復次欲樂父
母精氣衆緣和合故生名色芽無主無我無
造無壽者猶如虛空如幻從衆因緣和合而
生復次尊者舍利弗眼識從五因緣生云何

爲五眼色明空作意識便得生眼識依眼根
以色爲境界緣明以爲照虛空不作障礙作
意起發故生眼識如是衆緣若不和合眼識
則不生而眼識亦不作念我能作體相色亦
不作念我能作境界明亦不作念我能照了
空亦不作念我能無礙作意亦不作念我能
發起眼識眼識亦不作念我從爾數緣生如
此眼識實假衆緣和合而生如是次第諸根
生識亦如是說復次舍利弗無有法從此世
至他世但業果莊嚴衆緣和合便生又復舍

良八

十五

利弗譬如明鏡能現面像鏡面各在異所而無往來物見同處又復舍利弗如月麗天去地四萬二千由旬水流在下月曜於上玄象雖一影現衆水月體不降水質不昇如是舍利弗衆生不從此世至於後世不從後世復至於此世然有業果因緣報應不可損減復次尊者舍利弗如火得薪便然薪盡則止如是業結生識周遍諸趣能起名色果無我無主亦無受者如虛空如熱時焰如幻如夢無有實法而其善惡因緣果報隨業不亡又復

尊者舍利弗內十二因緣亦從五因緣生非常非斷不來不去因少果多亦相似相續次第而生云何非常一陰滅一陰生滅非即生非即滅故名非常云何不斷如秤高下此滅彼生故名不斷如實知見云何不來不去無有子去而至於芽亦無芽來而趣子所以是緣故無有從此至彼然實以少種能生多果云何相似而生如不善因生不善果如善因生善果以是故名相似相續而生又復舍利弗如佛所說能觀十二因緣是名正見若

正觀十二因緣者於過去身中不生有想於
未來身中亦不生無想衆生爲從何來去何
所至若沙門婆羅門及世間人成就諸見我
見衆生見命見丈夫見言不吉見如是十二
因緣如多羅樹剪滅其首更不得生我見則
除若人正見十二因緣若得如是思心尊者
舍利弗若有衆生能思是法此多陀阿伽度
阿羅呵三藐三佛陀善逝世間解調御丈夫
天人師佛世尊必爲授阿耨多羅三藐三菩
提記尊者舍利弗聞彌勒作是說已歡喜而

去天龍夜叉乾闥婆阿脩羅及諸大衆頂禮
彌勒歡喜奉行

佛說稻秆經

音釋

痒余兩切 灑七豔切 歛許勿切 穗徐醉切 清
疾智切 駛疾也 秤尺證切